



Protocol dalla radunonza communal Lumnezia (2013/01)

Datum: Venderdis, ils 8 da fevver 2013
Liug: Halla plurivalenta dalla casa da scola Sutvitg a Vella
Cuoz: 20:00 – 21:20 uras
Presents: 124 votantas e votants
Parsura: Duri Blumenthal, president communal
Actuar: Marcus Cavegn

Tractandas

1. Avertura ed elecziun dils dumbravuschs

Il president communal Duri Blumenthal fa in cordial beinvegni als participonts all'emprema radunonza communal dalla vischnaunca Lumnezia. El engrazia che tons han dau suatientscha al clom. Cun quei gi vegni aviarta ina nova pagina ella historia dalla val. Cun spért aviart ed innovativ hagian ils convischins dallas anteriuras vischnauncas da Cumbel, Degen, Lumbrein, Morissen, Suraua, Vella, Vignogn e Vrin decidiu da seunir ad ina vischnaunca. Il process seigi semadiraus duront decennis ad ina nova schientscha lumneziana.

Il president communal constatescha che la radunonza communal ei vegnida convocada ad uras conform allas determinaziuns ella constituziun dalla vischnaunca Lumnezia, aschia che la radunonza ei cumpetenta da prender conclus.

La gliesta da tractandas dils 25 da schaner 2013 presentada dalla suprastonza communal vegn approbada dalla radunonza communal.

La radunonza elegia dus dumbravuschs:

- Anton Pelican, Lumbrein;
- Arthur Caduff, Degen.

2. Fixar il pei da taglia sin las entradas e sin la facultad 2013

Ils 23 da settember 2012 veva la cuminonza dils votants all'urna approbau la lescha da taglia per la vischnaunca da Lumnezia. Tenor messadi da fusiun ei prevedida ina reducziun dil pei da taglia a 105% dalla taglia cantunala sempla sin entrada e facultad. Quei ei in pei da taglia realistic che duei valer per l'emprema perioda d'uffeci 2013 – 2016.

La radunonza communal decida unanimamein da fixar il pei da taglia communal per entrada e facultad per igl onn 2013 a 105% dalla taglia cantunala sempla sin entrada e facultad, sco prevediu el messadi per la votaziun davart la fusiun da vischnauncas.

3. Preventiv da quen 2013

1) Quen da resultats

La suprastonza communal presenta il preventiv dil quen da resultats 2013. Quel ei vegnius cumpilau sin basa dils quens annuals 2011 dallas otg vischnauncas che han fusiunau. Applicaus vegn il plan da contabilitad MCH1. Quei model da contabilitad harmonisau 1 duei vegnir remplazzaus ils proxims onns cul MCH2 sin basa dalla lescha davart las finanzas e davart la surveglianza da las finanzas (LFSF; DG 710.100) dils 25-09-2012, en vigur dapi igl 01-12-2012. Igl uffeci per las vischnauncas dil Grischun leva buca far in preventiv, la suprastonza communal ha denton decidiu, d'elavurar in tal e da presentar quel per approbaziun alla radunonza

comunala, era sche las cefras ein buca sacrosanctas. Senza in preventiv mauncan las directivas finanzialas per la vischnaunca.

Vegnus risguardaus ei in pei da taglia sin las entradas e la facultad da 105%.

La radunonza communal approscha il preventiv per il quen annual da resultats 2013 tenor la proposta dalla suprastanza communal. Quel cuntegn cuosts da CHF 17'286'800 ed in recav da CHF 22'477'000, e siara aschia cun in surpli d'entradas da CHF 5'190'200. Cumprida el recav ei la contribuziun cantunala per la fusiun da vischnauncas Lumnezia da 9.1 milliuns francs.

2) Quen d'investiziun

La planisaziun da finanzas 2013 – 2016 ha mo caracter d'informaziun e vegn presentada a quell'uisa alla radunonza communal. Ella cuntegn per gronda part caussas che las anteriuras vischnauncas han decidiu ni prevediu.

La radunonza communal pren enconuschientscha dil quen d'investiziun 2013 – 2016. Per igl onn 2013 ein prevedidas expensas da CHF4'923'600.

4. Elecziun dalla cumissiun da baghegiar Lumnezia

Tenor art. 64 dalla constituziun communal secumpona la cumissiun da baghegiar da treis commembers. Il commember dalla suprastanza communal responsabel per fatgs da baghegiar ei ex officio commember dalla cumissiun da baghegiar. D'eleger ein perquei aunc dus commembers. Annunziau interess per vegnir elegi ella cumissiun da baghegiar han

- Ursin Bundi, Morissen;
- Armin Caviezel, Vrin.

Decisiun

La radunonza communal elegia la cumissiun da baghegiar per la perioda d'uffeci 2013 – 2016. Il commember dalla suprastanza communal responsabel per fatgs da baghegiar ei ex officio commember dalla cumissiun da baghegiar. Quel ei Clemens Arpagaus.

Elegi vegnan ils dus ulteriurs commembers dalla cumissiun da baghegiar:

- Ursin Bundi, Morissen;
- Armin Caviezel, Vrin

5. Approbar la lescha da pumpiers per la vischnaunca Lumnezia

La suprastanza communal propona la lescha da pumpiers per la vischnaunca da Lumnezia per approbaziun alla radunonza communal. Il sboz ei vegnius elavuraus dils specialists da pumpiers e da Hansueli Roth dall'Assicuranza da baghetgs dil Grischun.

Martin Sgier fa ina cuntraproposta tier art. 7 al. 3 concernent l'obligaziun da prestar survetsch da pumpiers.

a) Proposta dalla suprastanza communal:

L'obligaziun da prestar survetsch da pumpiers entscheiva igl onn el qual il 21avel anniversari vegn cumplenius e finescha alla fin digl onn el qual il 50avel anniversari vegn cumplenius. Tenor basegns sa la suprastanza communal fixar autras regulaziuns en quei rom e sin proposta dalla cumissiun da pumpiers.

b) Proposta da Martin Sgier:

L'obligaziun da prestar survetsch da pumpiers entscheiva igl onn el qual il 18avel anniversari vegn cumplenius e finescha alla fin digl onn el qual il 47avel anniversari vegn cumplenius. Tenor basegns sa la suprastanza communal fixar autras regulaziuns en quei rom e sin proposta dalla cumissiun da pumpiers.

Decisiun

La radunonza communal decide cun 112 vuschs encunter 10 vuschs da suandar la proposta dalla suprastanza communal cun in'obligaziun da prestar survetsch da pumpiers naven dil 21avel entochen il 50avel onn.

La radunonza communal approbescha unanimamein la lescha da pumpiers per la vischnaunca Lumnezia per mauns dalla cuminonza dils votants all'urna.

6. Orientaziuns

1) Seconstituiziun dalla suprastanza communal

Sin fundament digl artechel 52 dalla constituiziun dalla vischnaunca Lumnezia ei la suprastanza communal seconstituida, ha repartgiu ils departaments communs ed ha nominau ils substituents da mintga departament communal per l'emprega perioda d'uffeci che cuoza digl 1. da schaner 2013 entochen ils 31 da december 2016.

- 1 Administraziun, segirtad publica, finanzas e taglias (presidial)
 Cau departament: Duri Blumenthal
 Substitut: Martin Capaul
- 2 Educaziun
 Cau departament: Elisabeth Lorez
 Substitut: Duri Blumenthal
- 3 Cultura, sanadad, segirtad sociala
 Cau departament: Ronnie Caminada
 Substituta: Elisabeth Lorez
- 4 Traffic, ovras publicas, ambient
 Cau departament: Daniel Solèr
 Substitut: Clemens Arpagaus
- 5 Planisaziun dil territori, immobiglias
 Cau departament: Primus Cavegn
 Substitut: Gioni Capaul
- 6 Fatgs da baghegiar
 Cau departament: Clemens Arpagaus
 Substitut: Daniel Solèr
- 7 Agricultura
 Cau departament: Curdin Capeder
 Substitut: Ronnie Caminada
- 8 Forestalesser
 Cau departament: Martin Capaul
 Substitut: Curdin Capeder
- 9 Turissem, svilup d'economia
 Cau departament: Gioni Capaul
 Substitut: Primus Cavegn

La suprastanza communal seraduna a Vignogn per sias sesidas.

2) Elecziuns per l'organisaziun dall'administraziun communal

La suprastanza communal ha definau las treis partiziuns dalla direcziun dall'administraziun communal ed ha elegiu ils menaders dallas partiziuns che fuorman la direcziun operativa.

- Marcus Cavegn, canzlist communal e meinagestiu dall'administraziun communal;
- Michael Spescha, contabilist communal e meinagestiu finanzas / taglia;

- Mario Alig, meinagestiun dil survetsch tecnic.
Selviculturs ein Hans Müller ed Andreas Clavadetscher.

3) **Votaziuns dil pievel dils 3 da mars 2013**

Ils 3 da mars 2013 han liug votaziuns dil pievel. Tgi che vota per correspundenza sa era metter il material da votar ellas scaffas da brevs dallas anteriuras vischnauncas.

4) **Gis da presenza dil president communal**

Per regla ei il president communal presents mintgamai il margis e la gievgia suentermiezgi en siu biro en casa communal a Vella.

7. **Varia**

1) **Approbaziun dil davos protocol dallas radunonzas communalas dallas anteriuras vischnauncas**

Ils protocols dallas davosas radunonzas communalas dallas anteriuras vischnauncas vegnan presentai alla radunonza communal Lumnezia per approbaziun cura ch'ils quens annuals 2012 dallas vischnauncas respectivamein dallas corporaziuns vegnan presentai per approbaziun.

2) **Corporaziuns d'aua a Lumbrein**

Ella vischnaunca da Lumbrein ein ils aquaducts els mauns da corporaziuns d'aua. La finamira dalla vischnaunca ei d'integrar quels aquaducts enteifer 5 onns el menaschi dalla vischnaunca.

3) **Fiasta da fusiun**

En in votum vegn animau da far ina fiasta da fusiun per la nova vischnaunca Lumnezia. Plans concrets ein buca avon maun da vart dalla suprastonza communal.

4) **Distribuziun dalla posta en Lumnezia**

En in votum vegn fatg attent che La Posta vul dislocar il center da distribuir la posta da Vella a Schluein. Il president communal sincerescha che la vischnaunca vegni ad intervegnir tier La Posta per empruar d'evitar quella dislocaziun. La finala decida denton La Posta.

5) **Adressas dallas casas**

Las adressas dallas casas vegnan buca midadas en consequenza dalla fusiun dalla vischnaunca Lumnezia.

6) **Finiziun**

Il president communal Duri Blumenthal engrazia als convischins che han priu part dalla radunonza communal per lur preschientscha e buna collavuraziun e giavischa in bien retuorn a casa.

7144 Vella, ils 8 da fevrer 2013

Il president:

Igl actuar:

Duri Blumenthal

Marcus Cavegn